

**Meeqqat atuarfianni ikiueqqaarnerup fagitut pinngitsoornani ilinniarneqartussatut atulersinneqarnissaa pillugu Naalakkarsuisut peqquneqarnissaanik Inatsisartut aalajangiiffigisassaattut siunnersuut**

**pillugu**

**Kultureqarnermut, Ilinniartitaanermut, Ilisimatusarnermut Ilageeqarnermullu ataatsimiititaliap**

**ISUMALIUTISSIISSUTAA**

**Aalajangiiffigisassatut siunnersuutip aappassaaneerreqarneranut tunniunneqartoq**

Kultureqarnermut, Ilinniartitaanermut, Ilisimatusarnermut Ilageeqarnermullu ataatsimiititaliap suliarinninnermini ukuninnga inuttaqarpoq:

Juliane Henningsen, Inuit Ataqtigiit

Harald Bianco, Inuit Ataqtigiit

Andreas Uldum, Demokraatit

Malik Berthelsen, Siumut

Naja Petersen, Atassut

Debora Kleist, Inuit Ataqtigiit

Kultureqarnermut, Ilinniartitaanermut, Ilisimatusarnermut Ilageeqarnermullu ataatsimiititaliap UKA09-imi siullermeerinnereernerup kingorna ulloq 20. oktober siunnersuut misissuataarpaa.

**Siunnersuutip imarisai**

Meeqqat atuarfianni ikiueqqaarnermik atuartitsineq aqqutigalugu pinaveersaartitsinermi suliaqarnermi nukittorsaanissaq siunnersuummi siunertarinearpoq. Taamaattumik Meeqqat atuarfianni 6. klassemiit qummut ikiueqqaarnerup fagitut pinngitsoornani, taamaattorli maannakkut tiimit allangortinngikkaluarlugit ilinniarneqartussatut atulersinneqarnissaa siunnersuuteqartumit kissaatiginearpoq. Maannakkut inatsisitigut sinaakkusiussat iluini fagip atuartitsinermut qanoq ikkunneqarnissaa Meeqqat atuarfiisa namminneq ataasiakkaarlutik aalajangigassaraat.

Siunnersuutip piviusunngortinneqarnissaanut atatillugu siunnersuuteqartumit kissaatiginearpoq, atuarfinni ataasiakkaani ikiueqqaarnermi ilitsersuisussanik marluk angullugit amerlassusilinnik ilinniartitsisoqassasoq.

**Siunnersuutip aningaasaqarnikkut kinguneqaatissai**

Nunatta Karsianut aningaasaqarnikkut kinguneqaatissat 1,3 million kronit missarluinnaanut ataasiaannarluni aningaasaliissutissatut siunnersuuteqartumit naatsorsorneqarput. Tassunga atatillugu ilitersuisumik soraartoqassagaluarpat ilitersuisunik pikkorissartitsinernut ukiumoortumik ingerlaavartumik aningaasartuuteqartarnissaq, soorluttaaq aamma ilitersuisut nunaqarfinni atuarfinnut angalanissaannut aningaasartuuteqarnissaq ilimagineqarsinnaasoq siunnersuuteqartumit naatsorsuutigineqarpoq.

**Inatsisartut siunnersuummik suliarinninnerat**

Siullermeerinninnermi partiit tamarmik siunnersuummut isumaqataanertik ersersippaat.

**Naalakkersuisut siunnersuummut oqaaseqataat**

Ikiueqqaarnerup atuartunut angajullernut pinngitsoorani atuartitsissutigineqartariaqaraluarnernik siunnersuuteqartumut Naalakkersuisut siullermeerinninnermi isumaqataanertik ersersippaat, taamaattumillu siunnersuut akuersissutigineqartussatut inassutigineqarpoq. Ilanngulluguttaaq Naalakkersuisut ilisimatitsissutigaaq, ikueqqaarnerup atuartuni qiterlarni asilerinnermi pinngitsoorani ilinniagassatut inissisimareermat. Kiisalu naggataatigut ikiueqqaarnerup meeqqanut atuartunut minnernut aamma pinngitsoorani atuartitsissutigineqarsinnaanera pisariaqassanersoq Naalakkersuisut eqarsaasersuutigineqarsinnaasutut isigaat. Aammattaaq ikiueqqaarnermik atuartitsissutip atuartunut nukarlernut pinngitsoorani aamma atuartitsissutinngortinneqarsinnaanera isumaliutigineqartariaqartoq Naalakkersuisunit oqaatigineqarpoq. Tamatumali timikkut ikiueqqaarnertut pinnagu tarnikkulli ikiueqqaarnertut iluseqartinneqarnissaa eqqarsaatigineqarluni.

Tamatuma kingorna inersuarmi siunnersuummik suliarinninnermi Naalakkersuisunut ilaasortap Mimi Karlsenip uparuarpaa, ikiueqqaarnerup pillugu fagi pinngitsoorani meeqqat atuarfianni atuartitsissutinngorpat ilinniartitsisoq tassunga atuartitsisinnaasariaqartoq. Taamaalilluni fagimut immikkut ittumik ilitersuisunik ilinniartitsinissaq pisariaqassanngilaq.

Naalakkersuisut ilisimavaat atuarfimmi atuaqatigiiaanut pingasunut tamanut ikiueqqaarnerup pillugu atuartitsissuteqareersoq. Taamaattorli Naalakkersuisut Inerisaavik qinnuiginiarpaat attuumassutillit allat, taakununga ilanngullugu assersuutigalugu Kalaallit Røde Korsiat suleqatigaluguluunniit atuartitsissutaareersunik nalileeqqullugu immaqalu ikiueqqaarnermi atuartitsissutinik kalaallisuunik iluarsaanermik nutaanilluunniit ineriartortitsinermik aallartitseqqullugu.

Atuaqatigiiaanut siunertat, atuartitsissutit pillugit siunertat kiisalu ilikkagassanut siunertat pillugit nalunaarut atuuttoq pillugu Inerisaavik nutarterinermik suliaqarluni aallartereernikummat sinaakkusiussani atuuttuni siunnersuut piviusunngortinneqarsinnaavoq.

### **Ataatsimiititaliap siunnersuummik suliarinninnera**

Siunnersuutip Inatsisartuni siullermeerinninnermi tiguneqarluarsimanera ataatsimiititaliap maluginiarpaa siunnersuutillu annertuumik tapersorsorneqarnera paasivaa.

Ikieqqaarnerup inuunermik annaassisinnaanera pillugu ataatsimiititaliaq siunnersuuteqartutulli isumaqarpoq. Aammattaaq meeqqat meeraanermiinnit tunngaviusumik ikiueqqaarnerq pillugu ilikkagaqarsinnaaqullugit atuarnermilu ingerlanerani sammisamut annertunerujartuinnartunik ilisimasaqalersinnaaqullugit meeqqat atuarfiat aallartiffissatut piukkunnarluinnarpoq.

Atuartut atuaqatigiiaani assigiinngitsuni atuartut ikieqqaarnermut uppersaammik imaluunnit ikiueqqaarnermut allagartamik pissarsisnaappata ataatsimiitiamit tamanna pitsaasutut isigineqassaaq.

Ataatsimiititaliap ilisimaaraa inuttut ineriakkiartornermi ilikkagassanut siunertat malillugit atuartut nukarliit naatsorsuutigineqartut:

- nammineq angerlarsimaffimmi, atuarfimmi avatangiisinilu imminut allanullu isumannaallisaaniarluni inatsisinik atuisinnaanissaq, tassunga ilaatillugu aqqusinermi avatangiisinilu angallannerit
- angerlarsimaffimmi, atuarfimmi pinngortitamilu ikiueqqaarnermi periusissat ilisimasaqarfigissallugit

Klassimi atuaqatigisat ilinniartitsisorisallu suleqatigalugit imminut qanoq pissuseqarfeqatigiinnissaminnik isumaqatigiissusiorsimassasut, tasanilu klassimi suleqatigiinnermi ataatsimoornermilu ajornartorsiuteqartoqalerpat qinngasaarinnermut uumisaarinnermullu maleruagassiorsimassasut aamma naatsorsuutigineqarpoq.

Taamaattumik atuartut nukarliit ikiueqqaarnermik ilinniartinneqarnissaannut taarsiullugu inuttut ineriakkiartornermik atuartitsissutinut atatillugu suliaqarfirmi ilisimasat

naapertorlugit atuartitsissutit nutarterneqarpata atuartitsissut tamanna atuartut nukarliit pissarsiviginerussaagaat ataatsimiititaliaq naliliivoq.

Taamaattumik naalackersuinikkut oqariartuutigineqartut taakku Naalackersuisunit isummerfigeqqullugit ataatsimiititaliamit kaammattuutigineqassaaq.

Tamanna tunngavigalugu ataatsimiititaliap isumaqatigiittup allannguutissatut siunnersuut imaattoq saqqummiutissavaa:

Ikiueqqaarnerup atuartuni akullerni angajullernilu pinngitsoorani  
atuartitsissutigineqartalernissaanik Naalackersuisut peqquneqarnissaannik Inatsisartut  
aalajangiiffigisassaattut siunnersuut.

Taama oqaaseqaateqarluni ataatsimiititaliap siunnersuut aappasaaniigassanngortippaa.

Debora Kleist

Harald Bianco

Andreas Uldum

Malik Berthelsen

Naja Petersen